

Xavareçal İonay girk

1

İonay Q'ONÇUĞOXUN t'ist'un

¹ Amit't'ayi ğar İona ^a Q'ONÇUĞON metər sa əyite p'ap'esp'i: ² «Hayza Ninevina taki! T'e kala şəhərə bakala amdarxo car k'alpi p'ap'esp'a ki, içoğoy biq'ala pis əşurxo Za p'ap'ene». ³ İona isə Q'ONÇUĞOXUN t'ist'un çureşi hayzeri içü pi gala təə, Tarşişane yaq'a baft'i. Taşi Yafona çurpi gəmiğoxun Tarşişa tağalt'u bəğəbi, iz yaq'e tənginal tadi t'e gəminə areşi ki, Q'ONÇUĞOXUN t'it'ale.

⁴ Ama Q'ONÇUĞON dənizə ost'ar muşə yaq'abi. Dənizə t'etər sa tufane əqəşi ki, male manst'ay gəminə bīyexun c'oybane. ⁵ Gəminə bakalt'oğə q'iyene haq'i, hərt'in bureqi iz buxaçuğə k'alpi içü çarkest'eynak' xoyinšbsa. Gəminə bakala yükəl c'evk'i bot'unseri dənizə ki, gəmi suuk'beq'an.

İona isə şiri gəmin boş bakala ot'ağxoxun sunt'u bask'i ost'ar nepaxeşi. ⁶ Gəmiçığoy kalo şot'ay t'öğöl hari pine: «K'ən bask'e? Hayza vi buxaçuğə k'alp'a, bərkə şot'in yax gorox hari çark'esadi».

⁷ Gəmiçığonal suna pit'un: «Ekinan çöp bosen, me bələ beş bel şi görə eysuna avabaken!» Çöpə bot'unseri,

çöpəl hari İonay loxole çurpi.

⁸ T'e vədə gəmiçığon şot'oxun xavart'un haq'i: «Şunu hun? Şi görəne me bələ beş bel hare? Vi əşlin s'i hik'ə? Mayinen eysa, mayalunu? Mani azuk'axunnu?» ⁹ İonan şot'oğə coğabe tadi: «Zu *əbranizu. Dənizxo, oçalxo yaratmişi göynul bakala Buxaçuğə, Q'ONÇUĞOZ bul k'os'bsa zu». ¹⁰ Şot'oğəynak' izi Q'ONÇUĞOXUN t'ist'una exlətbat'an isə gəmiçığə q'iyene haq'i. Şot'oğon içoğoy bula biq'i pit'un: «Hun mo he əşen biq'i?!»

¹¹ Tufan taysun ost'aarebaksay, t'e vədə gəmiçığon p'urum pit'un: «İsə yan va k'ə ben? Me tufana hetər şipben?» ¹² İonan şot'oğə "za ext'anan dənizə bosanan, şipbakale dəniz t'e vədə, me tufani za görə əq'esuna avazu" pine. ¹³ Ama gəmiçığon içoğoy axırinci zora laxi avar zapsat'un burqi. Taşi q'ariluğa c'eyseynak't'un çalışaksay, ama muşen tetərə funey ki, içoğoy çabalayinşsun ams'inane taysay.

¹⁴ T'e vədə şot'oğon Q'ONÇUĞO k'alpi pit'un: «Ay Q'ONÇUX, me amdari elmoğə haq'suna görə Hunal beş elmoğə ma haq'a! Me taxsırsuzi p'iya şipsuni cazina yax zapesmada! Axiri me bakiyoroX bito Vi çuresunene baki, ay Q'ONÇUX!» ¹⁵ Hametər,

şot'oğon İona ext'i dənizət'un boseri,
dənizə ěqeşi tufanal bot'ebaki.

¹⁶ Q'ONČUĞOY kalaluğa ak'i q'iyene
haq'i gəmiçiğö t'e vədə. Şot'aynak'
q'urbanxot'un eçeri, elas tadi
niyətt'unbi.

¹⁷ Q'ONČUĞON isə t'etəre bi ki, İona
kala sa çəlinene q'uc'p'i. Xib ği-xib şü
şo t'e çəlin tapanene mandı. ^b

2

İonay afırı

¹ İonan çəlin tapanexun iz Buxaçux
bakala Q'ONČUĞO k'alpi metəre afırıpi:

² «Bez t'ar ğine Q'ONČUĞOZ k'alpi
zu,

Şot'inal za coğabe tadi.

T'e dünüyeni bayinq'luğaxunez
haraypi,

Hunal za inbaki.

³ Bəğəloyluğxon badi Hun za,
Dənizi tumaz ak'i.

Xenene taşeri za,
Bito Vi ləpoox, Vi dalğooxe
Hari bez loxolxun c'ovaki.

⁴ Fikirezbi ki, bisti zu Vi piyexun,
ama təə!

Ak'oz zu hələ Vi İvel *xrama, bul
k'os'p'oz t'iyə!

⁵ Xenen za q'uc'epi,
Zapi taneşeri za.

Dənizi ile bez bel ləc'ureşi.

⁶ Xene oq'az taşi, buruxmoğoy
tumaz ak'i zu,

İşiğ bitala gane həmişəluğ but'eşi
bez baç'anexun!

Ama Hun, ay bez Buxaçux bakala
Q'ONČUX,

Za çarkesendi, za t'e
dünyənexunen zapi
c'evk'i!

⁷ Bez elmux bez boşt'an c'eğat'an,
Q'ONČUĞOZ eyex badi zu,

Bez afırıyal hari Va,
Vi İvel *xrama p'anep'i.

⁸ Əfçi buxaçuxxo bul k'os'balt'oğoy
Şaat'luği k'ə baksunaxun xavar
butene!

⁹ Ama zu Vi s'iyə alabala məğur
məğbsun

Vaynak' qurbanxo eçoz!

Bez elasp'i niyətp'it'oğö bitova bex
p'ap'esp'oz.

Çarkesun Vaxune eysa, ay
Q'ONČUX!»

¹⁰ T'e vədə Q'ONČUĞON t'e kala çəlinə
bürüşebi, şot'inal İona izi jomoxun
qaydi q'ariluğane boseri.

3

İonay Ninevina taysun q'a ninevaluğoy toobabsun

¹ Q'ONČUĞON İonaynak' p'əmci
kərəməl İz əyitə p'ap'esebi. ² «Hayza,
Ninevina taki! T'e kala şəhərə Bezi va
pit'oğö car k'alp'i bayanba!»

³ İonal hayzeri Q'ONČUĞOY əyiten
Ninevina yaq'ane baft'i. Nineva isə
kala şəhərey, şot'ay sa belxun başi t'e
belxun c'eyseynak' xib ğiney lazım.

^b1:17 Mat'. 12:40

⁴ Ama İonay hələ süftin ğine şəhərə başı "Nineva q'ırx ğınaxun oşa oçalen sa bakale!" upsun bəsebaki.

⁵ Ninevaluyox Buxaçuğoy vət'unbaki, *ğurux efi busat'un çurpi. Kala-mis'ik, bitot'in çul lapi içoğoy heq'ədər pəşman baksunat'un ak'est'i.

⁶ Me exlät taşı Ninevin padçağı ümögğ p'ap'at'an şo iz taxte loxolxune hayzeri, şot'inal iz padçağı paltara c'evk'i çul lapi jeq'e boşe arşi. ^c ⁷ İzi s'iyen əmir c'evk'i bayanbesedi: «Barta şuk'kalen iz jomo nə ukun, nə üğün maq'an duği. Barta heyvanxoval nə ot't'ağa, nəəl xe üğsa maq'at'un taşeri. ⁸ Barta amdarxon içoğoy loxol çul lapi, içoğoy eğel beliğoy loxolal çul lapest'i üşe-ğena Buxaçuğoq'at'un k'alpi. Pis yaq'en tağalo, şər əş biq'alo iz əməlxoxun kul haq'eq'an!

⁹ Avabakes tenebakon, bərkə t'e vədə Q'ONÇUĞON yax goroxe hari, İzi bok'osp'i şikala əcoğoy baskest'i yax tene əfçibi».

¹⁰ T'e vədə Buxaçuğon şot'oğoy me bit'oğoy, içoğoy pis yaq'axun c'eri *toobabsuna anak'i. Şot'oğoy gorox hariyal yaq'absun çureğala bəlinə tene yaq'abi.

^c**3:6** çul lapi jeq'e boşe arşi - Me hərəkəten yas efi toobabsunane ak'est'a.

4

Buxaçuğoy ük' bok'ospsuna ak'i İonay əcuğon biq'sun

¹ İonay isə me əşur sal xoşel tene hari, şot'ay əcoğone biq'i. ² Afırıpı Q'ONÇUĞO metərə pi: «Ay Q'ONÇUX, zu hələ bez oçalin boş bakat'an me əşlin metər çark'suna avazuy! Şot'o görəz Tarşışa t'it'eri. Avazuy, Hun ük' bok'osp'al, gele səbürlü, çuresun gele bakala Buxaçuğonu, bələ yaq'absunal Vi kul tene tağal! ^d ³ İsə haq'a bez elmoğoy, ay Q'ONÇUX! Zaynak' ene manst'axunsa bisun şaat'e».

⁴ Q'ONÇUĞON isə xavare haq'i: «Va gelene laft'i me əş?»

⁵ İonan şəhərin bel k'ə eysuna tamaşabsune çuresay, şot'o görəl şəhərexun c'eri bəğ c'eğalaç içeynak' sa tərəc düzbi şot'ay xojina areşi.

⁶ Q'ONÇUX Buxaçuğon isə t'etərə bi ki, düz İonay best'a sa xode eq'eşi. Şo kalabaki xojine sak'i, İonaynak' sərinluğ eçeri şot'o eğariğoxune q'orişi. İonal me xoda görə gelene mūqbaki. ⁷ Əyc'indəri işiğ bitat'an isə Q'ONÇUĞON me xodin tumeynak' sa meqe yaq'abi. Meq'en xoda tumexun k'as'epi, şoval şerenebaki. ⁸ Bəğ əqesit'uxun oşa, Buxaçuğon bəğ c'eğala tərəfəxun eğala gam muşe yaq'abi, bəğenal İonay bula t'etərə cərdi ki, tamam halnuxune biti. Bisun çureşi metərə pi: «Manst'axunsa

^d**4:2** C'eys. 34:6

biyayiz şo şaate».

⁹ Buxačuğon İonanaxun xavare haq'i:
«Me xode dərden metər əcoğon
biq'suna lafest'a?» İonanal "hoo,
lafest'a, həysə zaynak' bisun
mot'oxun şaat'e!" pine.

¹⁰ T'e vədə Q'ONČUĞON metəre coğab
tadi: «Sa xodeynak' vi ük'e bok'sa - vi
nu kalabi, iz loxol əzyət nu ak'i, sa ğiin
boş kalabaki oşin ğineyal q'aribaki sa
xodeynak'! ¹¹ P'oy Bez ük' hetər
maq'an bok'i Ninevaynak'? Sabaç q'a
hazar tanaxun gele iz yaq'a açesp'i
amdar, sahəkətal heyvan bakala t'e
kala şəhəreynak' bez ük' hetər
maq'an bok'i?»